



22. februar 2023

UPA 2023/161

Inatsisartut Suleriaasianni § 33 naapertorlugu aalajangiiffisassatut siunnersuut imaaattoq matumuuna saqqummiuppara:

**Takornariat umiarsuarnik takornariartaatinik tikittut tulannerminni isumannaallisaanikkut akitsuuserneqarnissaannik Naalakkersuisut UKA2024-mi Inatsisartunut saqqummiussassamik inatsisiliornissaat pillugu Inatsisartut aalajangiiffisassaaattut siunnersuut. Isumannaallisaanikkut akitsuutip siunertaraa inupparujussuit umiarsuarujussuarlutik tikittut tulannerminni timmisartukkut tikittutuut periuseq malillugu nalunaarsorneqartalernissaat, nunatsinnilu aningaasaqarnikkut iluanaarutigineqarsinnaalerlutik.**

(Inatsisartuni ilaasortaq Aqqalu C. Jerimiassen, Atassut)

### **Tunngavilersuut**

Takornariaqarneq aningaasaqarnikkut iluanaarutaassasoq taajuartarpalput, aningaasarsiornitsinnilu aningaasartuutaannginnissaattaaq imminullu akilersinnaalluartumik ingerlanissaa siunertariuarlugu.

Taamaattoriuna nunarpassuarnut allanut naleqqiulluta aningaasannanniarfiginerusinnaanerinut ajuusaarpallaarujuussuartugut. Uagut aasarsioriartilluta Europap USA-lluunniit kujataanut tikikkaagatta, unnuisarfissatsinnut apissikkaagatta akitsuutaasoq akileqquneqaraagat ataasinnguamilluunniit apeqquseeqqaarata akilertarpalput. Taassumallu eqqanaartarpaatigut, nunamut tikiffigisatsinnuttaaq akileraaqataasugut tikeraartuinnanngaluarluta, allatulli atuinissarput nunaannik eqqarsaatingalugu.

Island ukiuni kingunnerli takornariaqarnikkut ineriartupiloorsimaqaaq, ingasammillu aningaasaqarnermik ajaloreernerata kingorna tamaarsuullugu aningaasaqarnermik qaqueriarnissaanut suna tamaat nukissartik atorlugu takornariaqarnermik aningaasarsiorfigilernissaa ukkatarilersimavaat, iluatsillugulu, ila iluatsigaaramikku takornariat tikerartut allaat aqunniarnerat ajornakusoortiligaaramikku, nunaminnut tikissinnaneq akitsuiffagalugu.

Uagullu illuani takornariarpasuarnik tikerarneqarnerulernissarputtaaq aningaasarsiorfigilluarnissaalu ukiorpanni inuiaqtigiittut sinnattutta ilagiuarsimavaat, nikeriagaassanatali.

Islandimi Isavia-p ingerlatsinera umiarsuarnik takornariartaatinik inoqarfinni minnerpaaniluunniit umiarsuapiunersuit tikikkaluaraangataluunniit ajornaattumik ingerlassinnaasaraat ilisimaneqarpoq. Taakkualu tassa eqaannerusumik ingerlariuseqarnerminni inatsisit niunermi



ikinermilu erseqqaarissut pigisimavaat, kinaluunniillu niuniartoq ikiniartorlu isumannaallisakkakkooqquteqqaassaaq nalunaarsorneqaqqarlunilu.<sup>1</sup>

Nunatsinni suliffeqarfiiit pisortat pigisaatut ingerlasut nunami sanilitsinni Islandimi periussaasut ingerlatsinerannut paasisassarsiorfigisinnaalluaqaagut. Tassami nunatsinni maanna ingerlariuseq eqqarsaatigissagaanni, naalagaaffinngorumaqisut sunillu tamanik kissaaterpassuarnik noqqaqisut, allaffissornerlu nunalluunniit kommunistiskiusumik ingerlasut nuannaartunartissinnaasaanik ingerlariuseqartuartilluta, inerartoqqinnissaq kipusoorteqqajuarparput.

Oqartoqartarpoq, qallunaanngooq suleriusaat ilaaginnarlugu allaffissornikkut ingerlatsisugut, uangali tamanna imannak taasinnaavara; qallunaat allaffissornikkut periusaanniit inoqqortussuserput eqqarsaatingalugu agguaqatigiisillugu immaqa 100-joriaammik annertunermik ingerlavugut.

Takornariaqarnikkullu isertitaqarnerusinnaanermut inuussutissarsiornikkut eqqarsartaaseqarluarpalaarnerusumik, immitsinnullu nalimmassaalluarnerorpalaartumik suleriuseqarniarsinnaavugut, ilaatigut sorpassuit pisortat ingerlanniarisarat namminersortunut ingerlanneqarnerusinnerisigut.

Uani soorlu umiarsuit takornariartaatit tikittarneranni, nakkutilliinerunerup malittaani, tikittut kikkulluunniit sumiiffimmi namminersortut annertuumik iluaqtigisinnaanerulissavaat, niusut ikitullu tamarmik nalunaarsorneqarneruneratigut talittafigisamit, mittarfimmi tikittarneq assigalugu ingerlanneqarlualersinnaammat.

### **Aningaasatigut ingerlatsinikkullu pisortanut kingunerisassai:**

Ukiup ataatsip allaffissornikkut, tusarniaanermut inatsisiliornissamullu AC Fuldmægtigep suliaqartinneqarnissaa naatsorsuutigineqassaaq. Tamannalu 500.000kr-mik missaanik naleqassaaq.

### **Namminersortunut aningaasarsiornikkut allaffissornikkullu kingunerisassai:**

Soqanngilaq.

### **Innuttaasunut aningaasarsiornikkut allaffissornikkullu kingunerisassai:**

Soqanngilaq.

---

<sup>1</sup> [Ensk-utgafa-Gjaldskra-2022.pdf \(grundport.is\)](https://grundport.is/Ensk-utgafa-Gjaldskra-2022.pdf) Uani takuneqarsinnaavoq Islandimi qanoq isaaffiusut akitsuusersueriaaseqarnersut.